

Khoe Hue Beṭe Kī Misaal

Iḥjeel : Luqas 15:11-32

Īsā^(a.s) ne kahā, "Ek ādmī ke do beṭe the.⁽¹¹⁾ Choṭe beṭe ne apne waalid se kahā, 'Jaaydaad me se mujhe merā hissā de deejie.' To unke waalid ne jaaydaad ke do hisse kar ke apne donoṇ betoṇ me baraabar baaṛt diye.⁽¹²⁾ Choṭā beṭā apnā hissā le kar wahaan se chalā gayā. Wo bahut dur kisī dusre mulk me jā kar bas gayā. Wahaan usne apne paisoṇ ko ayyaashī me uḍā diyā.⁽¹³⁾ Uske paas jo bhī thā wo usne kħarch kar diyā. Wahaan par baarish nā hone kī wajah se sukhā paḍā aur pure mulk me khaane kā akaal paḍ gayā. Choṭe beṭe ko bhukh lagī thī aur usko paisoṇ kī bhī zarurat thī.⁽¹⁴⁾ Usko wahaan ke ek ādmī ke yahaan kaam mil gayā. Us ādmī ne usko maidaan me suaroṇ ko khaanā khilaane bhejā.⁽¹⁵⁾ Usko itnī zyaadā bhukh lagī thī ki uskā suaroṇ kā khaanā khaane kā dil kar rahā thā.⁽¹⁶⁾ Jab us beṭe ko ehasaas huā ke wo kitnā baḍā bewaquf hai, tab usne sochā, 'Mere waalid ke naukron ke paas bahut khaanā hai, lekin maiñ yahaan bhukh se marā jā rahā huṇ.⁽¹⁷⁾ Maiñ yahaan se apne waalid ke paas chalā jauṅgā. Maiñ unse kahuṅgā: Abbā jaan, maine āpke aur Allaah taa'älā ke kħilaaf gunaah kiyā hai.⁽¹⁸⁾ Maiñ is laayaq naheeñ ki āp mujhe apnā betā kaheñ islie āp mujhe apne naukar kī tarah samjhie.'⁽¹⁹⁾ To us beṭe ne wo jagah cħodī aur apne waalid se milne nikal paḍā.

"Apne beṭe ko waalid ne dur se hī ātā dekh liyā. Unheñ us par bahut taras āyā. Wo us se milne ke liye daud kar pahuñche aur usko gale lagā kar pyaar kiyā.⁽²⁰⁾ Beṭe ne kahā, 'Abbā jaan, maine āpke aur Allaah taa'älā ke kħilaaf gunaah kiyā hai, maiñ is laayaq naheeñ ki āp kā betā kahalaauṇ.⁽²¹⁾ Lekin uske waalid ne apne naukron se kahā, 'Jaldī karo! Isko sabse behatreen kapde lā kar pahanaao. Iskī uṅglī me ek aṅgutħī pahanaao aur pairon me jute.⁽²²⁾ Aur sabse moṭe bachde ko zibaah karo taaki ham log daawat kareñ aur jashn manā sakeñ!⁽²³⁾ Merā betā mar chukā thā, lekin ab wo phir se ziñdā ho gayā hai! Wo kho gayā thā, lekin ab mil gayā hai!' Aur wo sab kħushī manaane lage.⁽²⁴⁾

"Us waqt baḍā betā khet me hī thā. Jab wo ghar ke qareeb pahuñchā, to usne ghar se naach-gaane kī āwaazeñ ātī suneeñ.⁽²⁵⁾ Usne apne ek naukar ko bulā kar puchā, 'Ye sab kyā ho rahā hai?'⁽²⁶⁾ Us naukar ne bataayā, 'Āpkā bhaaī laut āyā hai. Āpke waalid ne mote bacħde ko daawat ke liye zibaah kiyā hai kyuñki āpkā bhaaī sahī salaamat ghar laut āyā hai!⁽²⁷⁾ Bađe beṭe ko ye sab sun kar ġussā ā gayā aur wo us daawat me naheeñ gayā. To uske waalid baahar ā kar us ko ańdar chalne ke liye manaane lage.⁽²⁸⁾ Us beṭe ne apne waalid se kahā, 'Maiñ kitne saaloṇ se ġulaamoṇ kī tarah āpkī kħidmat kar rahā huṇ? Maine hameshā āpkā hukm maanā hai, lekin āp ne kabhī mere liye jawaan bakre ko bhī zibaah naheeñ kiyā taaki maiñ apne dostoṇ ko daawat de sakuṇ.⁽²⁹⁾ Lekin āpkā dusrā betā jo āpkī saarī daulat ko ayyaashī me uḍā detā hai aur wo jab ghar waapas ātā hai to āp uske liye moṭetaaze bacħde ko zibaah karte haiñ!⁽³⁰⁾

"Uske waalid ne jawaab diyā, 'Mere beṭe, tum hameshā mere paas the aur jo bhī mere paas hai wo tumhaarā hai.⁽³¹⁾ Hamko kħushī manaanī chaahie ki tumhaarā bhaaī jo mar chukā thā, ab ziñdā ho gayā hai. Wo kho gayā thā, lekin ab mil gayā hai.'"⁽³²⁾